




# Islam Dalam Ketamadunan *Kelantan*

Editor

Mohd Fadli Ghani

Kelantan, Okt. 2018  


ISLAM DALAM KETAMADUNAN KELANTAN

Editor  
MOHD FADLI GHANI

INSTITUT PEMIKIRAN TOK GURU  
DATO' BENTARA SETIA  
2018



**ISLAM DALAM KETAMADUNAN KELANTAN**

**Cetakan Pertama : Safar 1440H/ Oktober 2018**  
**©Institut Pemikiran Tok Guru Dato' Bentara Setia**

**Hak Cipta Terpelihara:** Tidak dibenarkan sesiapa jua mengeluarkan ulang mana-mana bahagian artikel, gambar dan isi kandungan buku ini dalam apa jua bentuk dan dengan apa cara jua sama ada secara elektronik, fotokopi, mekanikal, rakaman atau cara lain sebelum mendapat keizinan bertulis daripada penerbit.

**Diterbitkan oleh:**

INSTITUT PEMIKIRAN TOK GURU DATO' BENTARA SETIA

Tingkat Bawah, Blok Dewan Negeri, Kota Darulnaim,  
15503 Kota Bharu, Kelantan.

Tel : 09-747 0919

Faks : 09-747 1045

Laman Web Rasmi: <http://www.iptg.my>

Email: [iptgkelantan@yahoo.com](mailto:iptgkelantan@yahoo.com)

**Cetakan oleh:**

HUMAI'S PRODUCTION (KT0349842-V)

Kg. Tunjong, Hadapan JPN, Jalan Kuala Krai,  
16150, Kota Bharu Kelantan.

+60137726897

**ISBN 978-967-12552-5-4**

## KATA PENERBIT

بِسْمِ اللَّهِ الرَّحْمَنِ الرَّحِيمِ  
السَّلَامُ عَلَيْنَا وَعَلَىٰ آلِنَا وَأَوْلِيَانَا  
وَمَنْ حَبَّبَ إِلَيْنَا آلَهُمْ وَاللَّهُ يَخْتَارُ

Alhamdulillah, segala puji-pujian hanya bagi Allah SWT. Berkat rahmat dan kurniaNya dapat buku *Islam Dalam Ketamadunan Kelantan* ini diterbitkan. Buku ini merupakan kesinambungan daripada Seminar Islam Dalam Ketamadunan Kelantan anjuran Institut Pemikiran Tok Guru Dato' Bentara Setia (IPTG) sebelum ini.

Kelantan merupakan sebuah negeri yang sinonim dengan agama Islam. Rakyatnya dikenal kuat beragama semenjak abad ke-12 serta kerajaannya komited melaksanakan syariat dan menggalakkan perkembangan dakwah & pendidikan Islam khususnya sejak abad ke-18. Justeru buku ini merakamkan perkembangan tersebut melalui lapan tajuk penting khususnya ulama dan pentadbiran kerajaan negeri.

Institut Pemikiran Tok Guru Dato' Bentara Setia (IPTG) selaku penerbit merakamkan jutaan terima kasih kepada para penulis yang sudi berkongsi hasil kajian masing-masing; Dr. Farid Mat Zin, Mohd Fadli Ghani, Dr. Wan Nik Wan Yussof, Prof. Madya Dr. Shukeri Mohamad, Syahir Sulaiman, Dr. Aslati, M. Ag, Dr. Mohd Syakir Mohd Rosdi, YB Datuk Dr. Mohd Khairuddin Aman Razali & Zulhimi Abd Rahman.

Semoga penerbitan buku ini dapat memberi manfaat kepada semua pihak dan dikira sebagai amal kebaikan dan ibadah disisi Allah SWT.

Dato' Dr. Johari Bin Mat

Pengarah

Institut Pemikiran Tok Guru Dato' Bentara Setia (IPTG)

Safar 1440/ Oktober 2018

## KANDUNGAN

<b>ALUAN PENERBIT</b>		... iii
<b>KANDUNGAN</b>		... iv
<b>PENULIS</b>		... v
<b>BAB 1</b>	<b>Peranan Ulama Dalam Pembangunan Tamadun Kelantan Sebelum Merdeka</b> Farid Mat Zin	...01
<b>BAB 2</b>	<b>Islam dan Perubahan Politik Di Kelantan</b> Mohd Fadli Ghani	...15
<b>BAB 3</b>	<b>Membangun Bersama Islam: Pembinaan Tamadun Kelantan</b> Wan Nik Wan Yussof	...41
<b>BAB 4</b>	<b>Amalan Siyasa Syar'iyah Dalam Pentadbiran Kerajaan Kelantan</b> Shukeri Mohamad	...69
<b>BAB 5</b>	<b>Ekonomi Berasaskan Syariat : Model Kelantan</b> Syahir Sulaiman	...101
<b>BAB 6</b>	<b>Tok Guru Nik Abdul Aziz Nik Mat: Analisis Terhadap Peranan Sebagai Ulama Dalam Pelaksanaan Syariat Islam Di Kelantan</b> Aslati, M. Ag & Mohd Fadli Ghani	...121
<b>BAB 7</b>	<b>Sumbangan Almarhum Tuan Guru Nik Aziz Terhadap Pembangunan Kelantan</b> Mohd Syakir Mohd Rosdi	...145
<b>BAB 8</b>	<b>Tamadun Baru Melayu Malaysia Berdasarkan Budaya Politik Matang dan Sejahtera di Kelantan</b> Mohd Khairuddin Aman Razali & Zulhimi Abd Rahman	...175
<b>RUJUKAN</b>		...196

## PENULIS

**Dr. Farid Mat Zain** merupakan seorang Pensyarah Kanan, Pusat Rantau Timur Tengah dan Nusantara, Fakulti Pengajian Islam, Universiti Kebangsaan Malaysia (UKM). Bidang kepakaran beliau ialah Ulama Nusantara, Sejarah dan Tamadun Islam di Malaysia dan Gerakan Islah.

**Mohd Fadli Ghani** merupakan seorang penyelidik politik dan sejarah. Beliau berkelulusan Ijazah Sarjana Muda Perbandingan Mazhab dan Hukum, UIN SUSKA, Riau; Sarjana Pengajian Peradaban, Universiti Malaya dan Sarjana Sains Politik, Universiti Kebangsaan Malaysia (UKM).

**Dr. Wan Nik Wan Yussof** merupakan Pengarah Pusat Kajian Strategik (PKS), Kerajaan Negeri Kelantan. Bidang kepakaran beliau ialah penyelidikan lapangan, politik, pentadbiran dan latihan jentera pilihan raya. Beliau juga pernah berkhidmat sebagai Setiausaha Politik Menteri Besar Kelantan.

**Dr. Shukeri Mohamad** merupakan seorang Professor Madya di Akademi Pengajian Islam, Universiti Malaya. Bidang kepakaran beliau ialah Perhubungan Antarabangsa Islam, Pemikiran Politik Islam, Kepimpinan Islam dan Siasah Syar'iyah.

**Syahir Sulaiman** merupakan Setiausaha Politik Presiden Parti Islam SeMalaysia (PAS). Berkelulusan Sarjana Muda Ekonomi, Universiti Islam Antarabangsa Malaysia (UIAM) dan Sarjana Pengajian Pembangunan, Universiti Malaya (UM).

**Dr. Aslati, M. Ag** merupakan seorang Pensyarah Fakulti Dakwah dan Komunikasi, UIN Sultan Syarif Kasim (UIN Suska), Riau. Bidang kepakaran beliau ialah Hadis. Berkelulusan PhD dari UIN Suska, Riau.



BAB 6

---

**TOK GURU NIK ABDUL AZIZ NIK MAT: ANALISIS TERHADAP  
PERAN SEBAGAI ULAMA DALAM PELAKSANAAN SYARIAT  
ISLAM DI KELANTAN**

*Aslati, M. Ag  
Mohd. Fadli Ghani*

**Pendahuluan**

Nabi Muhammad SAW diutus oleh Allah SWT ke muka bumi untuk menyampaikan risalah Islam sebagaimana dinyatakan di dalam Al-Quran dan Sunnah yang diperuntukkan bagi seluruh alam serta mengatur semua aspek dalam kehidupan manusia.

Islam adalah agama Risalah dan Dakwah. Rasulullah SAW di utus kepada seluruh umat manusia sebagai mana yang terdapat dalam firman Allah SWT di dalam Al-Quranyang bermaksud:

*Artinya: "Dan tidaklah kami mengutus engkau melainkan (menjadi Rasul) untuk membawa berita gembira dan peringatan kepada seluruh umat manusia". (QS. As-Saba': 28).*

Selama 23 tahun Nabi Muhammad SAW menjalankan risalah kenabiannya dan berhasil menjadikan Al-Quran dan Hadis sebagai tuntunan hidup umat Islam. Setelah Rasul wafat maka perannya digantikan oleh para Ulama sebagai penerusperanan misi kenabian tersebut. *Ulama adalah pewaris nabi,"* begitu jelas

Rasulullah dalam sebuah hadis yang diriwayatkan Abu Dawud dan Tirmizi. Menurut Ibnu Hajar Al-Atsqalani (773-852) dalam *Fath al-Bary*, Hadis tersebut adalah Hadis yang ditemukan dalam beberapa kitab Hadis, antara lain dalam kitab-kitab Abu Dawud, at-Tirmizi dan Ibnu Hibban. (Ibnu Hajar 1959 : 169).

Ulama mempunyai tanggungjawab penting berkaitan soal beragama dalam masyarakat, dimana segala aktiviti yang dilakukan oleh ulama dapat menjawab berbagai masalah yang dihadapi oleh masyarakat. Dalam hal ini wajar jika dalam beberapa hadis Rasul mensyaratkan beberapa karakteristik yang harus di miliki oleh ulama kerana mempunyai tanggungjawab kepada umat. Adapun karakteristik seorang ulama menurut pemahaman Hadis Nabi diantaranya : Ulama yang mengamalkan ilmunya, bersifat *Wara*, Tidak bercita-cita terhadap harta dan kekuasaan, ikhlas dalam beramal dan tidak bersifat dengki, bersikap amanah dan menyampaikan ilmu, bersikap istiqamah (lurus), bersikap dinamis, bersikap terbuka dan demokratis, membimbing umat menuju kesempurnaan serta jujur dan selalu berfatwa berdasarkan pengetahuan.

Setidaknya adalah empat fungsi atau peranan yang melekat pada diri ulama yakni *Tabligh* (Menyampaikan), *Tabayyun* (Menjelaskan), *Tahkim* (Mengeluarkan Hukum) dan *Uswah* (Teladan). Meskipun mendapat cabaran yang datang baik dari kalangan umat Islam itu sendiri maupun yang datang dari luar Islam namun peranan tersebut harus disampaikan kepada umat. Ulama harus dapat menyampaikan syariat Islam dengan cara dan kaedah terbaik agar syariat Islam menjadi solusi bagi kehidupan. (Hafifuddin: 2014: 120)



Syariat Islam merupakan *khitab*<sup>20</sup> Allah SWT yang harus digali dari sumber asli yakni Al-Quran dan Hadis serta harus ditelaah kembali kitab-kitab karya ulama terdahulu yang telah merintis pemikiran tentang syariat Islam. Selanjutnya yang tidak kalah pentingnya adalah ulama juga harus menelaah liku-liku perjalanan penerapan syariat Islam itu sendiri dari masa ke masa. (Hafifudin 2014 : 121).

Penegakan syariat Islam merupakan suatu keperluan yang mendasar dalam upaya menjawab cabaran zaman dan sebagai solusi pemecahan masalah dalam kehidupan masyarakat Islam. Upaya penegakan syariat Islam yang *kaffah* di Kelantan tentu saja tidak terlepas dari peranan ulama kerana mempunyai kemampuan dalam berijtihad untuk menghasilkan suatu hukum.

Disamping itu ulama melakukan ijtihad untuk mencari bentuk syariah Islam yang mudah dilaksanakan sesuai dengan keadaan setempat sebagaimana yang tercermin dalam kehidupan masyarakat di Kelantan. Dasar pemikiran bahwa syariat Islam yang akan diterapkan harus sesuai dengan *maqasid al-syariah* yang berdasarkan nas Al-Quran dan Hadis dengan mempertimbangkan kemajuan zaman yang sedang berlangsung. Sementara itu yang menjadi pekerjaan rutin ulama dalam menerapkan syariat Islam adalah mengeluarkan fatwa serta nasihat. Oleh kerana itu sudah selayaknya ulama sebagai sumber kekuatan bagi pelaksanaan syariat Islam di Kelantan.

Corak Islam yang ditampilkan oleh Kelantan tidak terlepas dari peranan ulama. Sesuai dengan kajian penulis dalam tesis

---

<sup>20</sup> Khitab adalah bahan atau isi sebuah pembicaraan, atau tulisan yang terdapat antara pembicara dan pendengar, antara orang yang menyeru dan yang diseru atau antara penulis dan pembaca.

Kedoktoran (PhD) maka penulis memilih tokoh terkenal iaitu Tok Guru Nik Abdul Aziz Nik Mat sebagai fokus kajian.

Kelantan di bawah kepemimpinan Nik Abdul Aziz Nik Mat menampilkan corak yang berbeza dengan negeri lainnya di Malaysia dalam pelaksanaan hukum Islam. Tok Guru Nik Abdul Aziz Nik Mat lahir di Kota Bharu Kelantan, 10 Januari 1931 dan meninggal dunia pada 12 Februari 2015. Memperoleh pendidikan di sekolah kebangsaan dan pondok semasa kecil hingga remaja di Kelantan sampai Terengganu kemudian melanjutkan pendidikan ke India, Lahore Pakistan dan melanjutkan ke al-Azhar Mesir. Menjalani pendidikan selama lebih kurang 12 tahun dan kembali ke kampung halaman yakni Kelantan pada tahun 1962. Awalnya Nik Aziz aktif dalam bidang dakwah dan pendidikan. Namun kemudian terjun ke dunia politik. Peranan Tok Guru Nik Abdul Aziz dalam membumikan nilai-nilai Islam di Kelantan tentu tidak diragukan lagi, hal ini terbukti dengan tegaknya syariat Islam dalam segala aspek kehidupan baik dalam kehidupan sosial kemasyarakatan mahupun dalam perlembagaan pemerintahan. Peranan ulama sebagai *Tabligh*, *Tabayyun*, *tahkim* serta *uswah* sangat tercermin dalam diri Tok Guru Nik Abdul Aziz Nik Mat.

Adapun point penting yang akan dibentangkan dalam makalah ini mencakup: i. Definisi Ulama Dan Definisi Syariat Islam, ii. Tinjauan Sejarah Tentang Peranan Ulama Dalam Pelaksanaan Syari'at Islam Di Kelantan Serta Peranan Tok Guru Nik Abdul Aziz Nik Mat Dalam Menegakkan Syariat Islam Di Kelantan. Manakala bahagian penutup dari makalah ini adalah berisi kesimpulan.

## **PERBAHASAN**

### **Tinjauan Umum Tentang Ulama**

Banyak versi pendapat terkait definisi ulama baik menurut bahasa, terminologi maupun pendapat para ilmuan. Ulama adalah orang yang mempunyai pengetahuan tentang ayat-ayat Allah SWT baik yang bersifat *kawniyah* maupun yang *qawliyah*. Dengan ilmu itu dapat mengantarkan kepada kebenaran Allah SWT serta dapat melahirkan rasa takut, tunduk dan takwa. (M. Quraish Shihab 1994 : 382).

Ibnu Qayyim mengemukakan pendapatnya tentang ulama mengambil pendapat Imam Syafi'i, menurutnya ulama dikaitkan dengan kebolehannya berfatwa yaitu: Pertama, yang dapat berfatwa adalah orang yang mengetahui Al-Quran dengan mengetahui *nasakh* dan *mansukh*, memahami *muhkam* dan *mutasyabih*, memahami *ta'wil* dan *tanzilnya*. Kedua, ulama harus mengetahui al-Hadis. Ketiga, ulama harus mengetahui tatabahasa Arab. Keempat, ulama harus mengetahui ilmu alat yang diperlukan untuk memahami isi Al-Quran dan Hadis. Kelima, ulama mengetahui perbezaan pendapat dikalangan para ulama di pelbagai kota. (Ibnu Qayyim al-Jauziyah: 1993: 51).

Imam al-Gazali membezakan terhadap keperibadian ulama itu sendiri, menurutnya ulama itu ada dua iaitu ulama yang berorientasi dunia dan ulama yang berorientasi akhirat. Ulama yang berorientasi dunia adalah sibuk mengurus urusan dunia dan mengumpulkan harta secara tamak untuk memenuhi keperluan peribadinya manakala ulama yang berorientasi akhirat adalah ulama yang bekerja menurut panggilan hati nurani dan ikhlas kerana Allah SWT dengan tujuan yang sangat mulia iaitu untuk menyelamatkan kehidupan manusia dari kegelapan dan kebodohan menuju



kehidupan yang penuh dengan ilmu pengetahuan dan cahaya.  
(Hafifuddin: 2014: 19).

Sementara Wahbah Zuhaili mengemukakan kriteria ulama yang dikutip oleh Rusydi Ali Muhammad (2003: 75-76) adalah:

1. Menguasai Al-Quran
2. Mengetahui Ijma' sehingga ia tidak sampai mengeluarkan fatwa yang bertentangan dengan Ijma'
3. Mengetahui bahasa Arab yang memungkinkannya menggali hukum dari Al-Quran dan Sunnah secara baik dan benar
4. Mengetahui ilmu usul fiqh, kerana melalui ilmu inilah diketahui dasar-dasar dan cara-cara berijtihad.
5. Mengetahui nasikh (yang menghapuskan) dan mansukh (yang dihapuskan)
6. Mengetahui permasalahan seputar qiyas, mencakup persyaratan-persyaratannya, illat-illat hukum dan metodologi istimbatnya dari nas.
7. Mengetahui pemahaman tentang maqasid syariah dalam menetapkan hukum.

Di dalam Al-Quran dijelaskan Ulama adalah seorang pemimpin agama yang dikenal masyarakat akan kesungguhan dan kesabarannya dalam menegakkan kebenaran, sebagaimana firman Allah SWT, yang bermaksud:

*"Kami jadikan di antara mereka itu pemimpin-pemimpin yang memberi petunjuk dengan perintah Kami, ketika mereka sabar. Dan adalah mereka meyakini ayat-ayat kami." (Q.S. As-Sajadah (32): 24).*

Ulama adalah seorang yang menekuni dan mendalami agama kemudian mendakwahnya kepada umat. Allah *Azza wajalla* menegaskan, yang bermaksud:

*"Tidak sepatutnya bagi mukminin itu pergi semuanya (ke medan perang). Mengapa tiap-tiap golongan tidak mengutus beberapa orang untuk memperdalam agama lalu memberi peringatan kepada kaumnya, apabila mereka telah kembali; supaya mereka itu dapat menjaga diri." (Q.S. At-Taubah (9): 122).*

Dari beberapa definisi yang dikemukakan serta kriteria ulama di atas maka menurut hemat penulis bahwa Tok Guru Nik Abdul Aziz Nik Mat sangat memenuhi ciri-ciri ditetapkannya sebagai seorang Ulama.

### **Tinjauan Umum Tentang Syariat Islam.**

Syariat Islam secara etimologi bermakna jalan menuju mata air (Ibnu Manzhur al-afriqi tt: 40-41). Syariat Islam adalah jalan yang lurus atau jalan yang dilalui air (TM. Hasbi As-Shiddiqy 1974: 19). Menurut terminology, Syari'at adalah sebagai jalan yang harus ditempuh (oleh setiap umat Islam) (Muhammad Daud Ali 2003: 30). Secara teknikal Syariat dalam bahasa Inggris dikenal dengan istilah *Common Law Of Islam*, yaitu keseluruhan dari perintah-perintah Tuhan, setiap perintah hukum. (A. Rahmat 2006: 37). Menurut Fazlurrahman bahwa Syari'at adalah jalan menuju kehidupan yang baik berupa nilai-nilai agama yang diungkapkan secara fungsional dalam makna yang konkrit (Fazlurrahman 1979 : 100).

Syari'at Islam dapat difahami melalui dua dimensi yaitu dimensi *Ilahiyah* di mana Syari'at sebagai wahyu Allah dan dimensi perintah yang harus dilaksanakan dalam kehidupan. Dalam pengertian istilah, Syari'at Islam adalah mencakup aspek hukum dari ajaran Islam yang lebih berorientasi pada aspek *lahiriyah*. Namun demikian kerana Syari'at merupakan ajaran yang tunggal dan tidak lepas dari akidah sebagai asas dan akhlak yang menjiwai dan tujuan

dari Syari'at itu sendiri. Al-Quran dan Hadis sebagai sumber hukum Islam ternyata memuat ketentuan yang bersifat *interpretable* dan ketentuan yang bersifat muktamad. Ketentuan *interpretable* menjadi medan bagi para fuqaha untuk melakukan ijtihad, sehingga melahirkan aturan-aturan hukum yang sesuai dengan keperluan zaman dan masa. (Hafifuddin 2014 : 32).

Kata Syari'at juga sinonim dengan kata fiqh yang artinya pengetahuan tentang Syari'at Islam mengenai perbuatan manusia yang diambil dari dalil-dalilnya secara terperinci atau dengan kata lain merupakan perundangan atau kumpulan hukum-hukum Syari'at Islam mengenai perbuatan manusia yang diambil dari dalil-dalilnya secara terperinci. (Abdul Wahab Khallaf 1996 : 2). A. Qadri Azizy mengatakan bahwa dalam sejarahnya istilah fiqh mengalami perkembangan yang mencakup tiga fasa : Pertama, bahwa fiqh bermakna faham. Pada masa ini fiqh diertikan sebagai memahami agama dari ayat-ayat Al-Quran atau Hadis. Dengan demikian Fiqh mengarah pada proses untuk memahami atau menafsirkan Al-Quran dan Hadis. Kedua, fiqh dan ilmu keduanya mengarah pada pengetahuan (*knowledge*). Dalam tempoh ini fiqh mengarah pada pemikiran tentang agama atau pengetahuan tentang agama. Ketiga, fiqh bererti suatu jenis disiplin dari disiplin ilmu agama Islam iaitu dari disiplin hukum Islam atau hukum positif hukum Islam. (A. Qadri Azizy 2002 : 3-4).

Pengertian Syari'at Islam yang berkembang dewasa ini tentu saja tidak terlepas dari pengertian yang diberikan oleh para pakar, seperti Abdullah Yusuf Ali menerjemahkan kata Syari'ah sebagaimana yang dikutip oleh Syahrizal bahwa Syari'at Islam sebagai *the right way of the religion* (jalan agama yang betul) yang lebih luas dari sekadar ibadah-ibadah formal dan ayat-ayat hukum yang diwahyukan kepada nabi Muhammad SAW. Sementara itu menurut



A. Qadri Azizy bahwa Syari'at berarti jalan besar untuk kehidupan yang baik (*the high way of good life*) yakni nilai-nilai agama yang dapat memberi petunjuk bagi setiap manusia. Lebih fokus lagi apa yang disampaikan oleh Rifyal Ka'bah bahawa memahami Syari'at sebagai hukum Ilahi dengan pengertian bahawa ia adalah perwujudan konkrit dari kemahuan Ilahi melalui kepatuhan manusia untuk mengikuti tuntunan-Nya baik dalam kehidupan peribadi mahupun dalam kehidupan masyarakat. (Hafifuddin 2014 : 34).

Adapun Syari'at Islam yang dimaksudkan dalam penulisan ini adalah pembumian nilai-nilai agama Islam dalam kehidupan bermasyarakat serta bernegara di Kelantan kaitannya dengan hubungan manusia dengan sang Pencipta, hubungan antara sesama manusia serta hubungan manusia dengan alam.

### **Tinjauan Sejarah Terhadap Peranan Ulama Dalam Pelaksanaan Syariat Islam Di Kelantan**

Kewujudan Islam di Kelantan mempunyai etos<sup>21</sup> yang tinggi dewasa ini bukanlah muncul secara segera melainkan berangkat dari perjuangan dan perjalanan panjang sejarah pada masa lalu. Terlepas dari keterbatasan implikasi dari ketentuan Perlembagaan Malaysia tentang posisi Islam sebagai agama rasmi, negara turut mendukung menguatkannya Islam di Malaysia secara umum dan khususnya Kelantan.

Sejarah masuknya Islam di Kelantan di tandai dengan munculnya kerajaan Islam dengan tarikh 1181 M (577 H). Hal ini dibuktikan dengan penemuan sebuah syiling emas di kota Kubang Labu. Pada syiling emas tersebut tercatat "*Al-Julus Kelantan*" (Kerajaan Kelantan) dan "*Al-Mutawakkil ala Allah*" (Yang berserah kepada Allah) yakni gelar yang dipakai oleh Raja. Menutup catatan

---

<sup>21</sup> (étos) sifat ciri sesuatu bangsa, budaya, era, dll

Ibnu Batutah bahwa pada tahun 1297 terdapat raja perempuan yang beragama Islam di Kelantan yang memakai gelar "*Urduja*". (Fadli Ghani (ed) 2011 : 58).

Pada abad ke-14, muncul seorang ulama yakni Sheikh Ismail yang berasal dari Samudera Pasai dan mengembangkan dakwah Islam di Kelantan. Pada tahun 1349 datanglah seorang ulama yang bernama Syed Hussein Jamadil Kubro dan mengembangkan dakwah Islam di Istana pada masa pemerintahan Sultan Mahmud Shah. Pada perkembangan selanjutnya dakwah Islam di Kelantan tepatnya abad ke-16 muncul seorang ulama dari Patani dan mendirikan beberapa pondok yang berpusat di Kampung Sena, Teluk Manok dan Pauh Bok. Tradisi keilmuan yang ada di pondok ini erat kaitannya dengan Pattani, Aceh dan Mekah.

Peranan Ulama yang signifikan dalam pelaksanaan Syariat Islam terjadi pada abad ke-18 pada masa Dinasti Long Yunus. Hal ini ditandai dengan :

1. Dilantiknya Ulama sebagai penasihat Sultan sejak tahun 1800 diantaranya Sheh Abdul Halim Yunan, Tok Pulai Chondong dan Tuan Guru Haji Abdullah Jalaludin.
2. Terbentuknya institusi Mahkamah Balai sebagai Peradilan Syariah pada 1837 dengan Syed Jaafar Syed Alwi (Engku Hakim) sebagai Qadhi Besar.
3. Dilantiknya Sheikh Wan Abdul Rahman Muda Wan Othman sebagai Mufti Kelantan pada 1837.
4. Pelaksanaan hukum Syariat termasuk Hudud seperti yang tercantum dalam Hikayat Seri Kelantan sejak 1840-an.
5. Penerimaan kitab fiqh *Bughyat al-Mustarsyidin* dan *Mu'in al-Hukkam* sebagai teks Undang-undang Syariat di Kelantan di mulai pada 1840-an.
6. Munculnya sistem pendidikan Pondok di Kelantan pada 1820 hingga Kelantan dapat menggantikan Patani sebagai pusat kajian Islam dan dikenal sebagai Serambi Mekah.

Dalam perkembangan sejarahnya Kerajaan Islam di Kelantan yang pernah ada diantaranya: *Al-Mutawakkil* (Abad ke-12), Dinasti raja Suran (1345-1632), Dinasti raja Jembal (1632-1763), dan Dinasti Long Yunus (1963-sekarang). Namun demikian Kerajaan Islam di Kelantan juga dipengaruhi oleh Siam dan Inggeris pada tahun 1902 kemudian mengubah Undang-undang Syariat Islam termasuk dihapuskannya Mahkamah Islam di Kelantan secara bertahap mulai pada 1911.

Munculnya kelompok Ulama baru yang diketuai oleh Tok Kenali (1870-1933) bersama Dato' Perdana Nik Mahmud dan Dato' Laksamana Mohd Said yang melakukan pembaharuan pelaksanaan Syariat Islam di Kelantan. Adapun pembaharuan yang dilakukan di antaranya adalah :

1. Dibentuknya Majlis Agama Islam dan Istiadat Melayu Kelantan (MAIK) pada 1915
2. Didirikannya sekolah MAIK pada 1917 mengikut sistem moden.
3. Penerbitan majalah Pengasoh pada 1918 yang membawa pemikiran pembaharuan Islam.
4. Pengurusan Lembaga Masjid dan Zakat seluruh Kelantan yang dimulai pada 1916.
5. Menjadikan masjid Muhammadi sebagai pusat Pengajian Tinggi Islam seperti Masjidil Haram Mekah.

Setelah perang dunia II (1945), terjadi perubahan politik yang pada akhirnya membawa Malaysia kepada kemerdekaannya pada 1957. Hal ini juga ikut mempengaruhi perkembangan Islam di Kelantan. Terbentuknya parti politik PAS juga sangat berpengaruh terhadap pelaksanaan Syari'at Islam di Kelantan kerana didukung oleh Ulama. Pada tahun 1959 PAS berhasil mengambil alih pemerintahan Kelantan hingga tahun 1978. Selanjutnya terjadi pembaharuan hukum Islam yang dilaksanakan oleh Ulama bersama kerajaan PAS (1959-1978) di Kelantan adalah sebagai berikut:



1. Menghapuskan aktiviti yang bertentangan dengan Syari'at Islam seperti judi, sabung ayam, pelacuran, kelab malam, amalan syirik dan khurafat.
2. Membangun sistem pendidikan Islam melalui pengambilalihan Sekolah Agama Rakyat, mewujudkan biasiswa pengajian Agama, mengadakan sijil agama yang diiktiraf dan mendirikan Yayasan Pengajian Tinggi Islam Kelantan (YPTIK) yang diiktiraf setaraf dengan Universiti Al-Azhar.
3. Mewujudkan Undang-undang Mahkamah Syari'ah dan Hal Ehwal Perkawinan Islam pada 1966
4. Memisahkan fungsi Mufti dan Qadhi dan menyusun Institusi Agama

Pada tahun 1978-1990 Barisan Nasional pernah menguasai Kelantan dan tidak mengutamakan pelaksanaan Syari'at Islam. Namun pada tahun 1990 ketika Kelantan dipimpin oleh Tok Guru Nik Abdul Aziz Nik Mat sebagai Menteri Besar maka pelaksanaan Syari'at Islam menjadi agenda utama dalam pemerintahan dan segala aspek kehidupan masyarakat di Kelantan. (Mohd. Fadli Ghani (ed), 2011)

### **Peranan Tok Guru Nik Abdul Aziz Nik Mat Dalam Menegakkan Syariat Islam di Kelantan**

Dalam rangka menegakkan Syari'at Islam di Kelantan, Tok Guru Nik Abdul Aziz Nik Mat dalam posisinya sebagai Ulama melaksanakan peranannya melalui beberapa pendekatan diantaranya:

#### **a. Pendekatan Melalui Dakwah**

Peranan *Tabligh* sebagai seorang Ulama dijalani Tok Guru baik sebelum mahupun setelah menjadi Menteri Besar Kelantan. Tok Guru aktif berdakwah di setiap kesempatan di majlis-majlis secara formal maupun non formal serta melalui media massa. Teras dari dakwah

Islam sesungguhnya adalah menegakkan pelaksanaan syariat Islam di tengah masyarakat termasuk di pemerintahan. Mengenai hal ini Tok Guru Nik Abdul Aziz Nik Mat mengungkapkan bahawa melaksanakan syariat bukan sesuatu yang mudah. Ia tidak semudah yang disebut oleh bibir dan tidak semudah memenangkan kerusi dalam Pilihan Raya. Pasti ada liku dan dugaan yang cuba menghalanginya. Pasti ada onak dan duri yang meranjau perjalanan untuk menegakkan Islam ataupun melaksanakan Islam dalam sebuah masyarakat. (Wan Ji Wan Husin dan Saifulamri M. Hussin 1982 : 178-179)

Apalagi dalam sekelompok masyarakat dari zaman ke zaman di lingkungan kehidupan yang tidak berasaskan Islam. Segala amalan yang sekian lama berurat-berakar dalam masyarakat tidak mudah untuk dicabut dan dihilangkan dari kehidupan dan digantikan dengan amalan yang bertepatan dengan Islam. Hal ini kerana kebiasaan masyarakat yang sudah mendalam terhadap segala tradisi tersebut akan menimbulkan penolakan seandainya mahu dihapuskan tanpa aturan yang jelas.

Justeru tidak menghairankan apabila ditelusuri sejarah pemerintahan para khalifah tidak semua tuntutan Islam dapat mereka laksanakan sempurna mungkin sepanjang memegang tampuk pemerintahan. Tidak heran juga apabila kita melihat usaha mereka melaksanakan Islam itu mengalami berbagai cabaran dari mereka yang membenci Islam. (Wan Ji Wan Husin dan Saifulamri M. Hussin 1982 : 189)

Bahkan pada zaman Rasulullah SAW sendiri, usaha baginda senantiasa mendapat pertentangan dari pihak yang tidak menyukainya. Bukan saja kalangan musuh yang nyata akan tetapi di kalangan pengikut sendiri terkadang timbul kekeliruan ketika sesuatu pelaksanaan dasar berkaitan Islam itu hendak dilaksanakan.

Adapun penentangan pihak musuh itu adalah disebabkan sifat asli mereka yang selamanya tidak mahu menerima Islam. Ini bukan perkara yang memusingkan kepala kerana mereka ini telah nyata kekufurannya dan selamanya akan menolak dan menentang Islam.

Adanya kekeliruan di kalangan pengikut biasanya timbul lantaran ketidakfahaman mereka terhadap apa yang mahu dilaksanakan oleh pemerintah. Kebodohan yang masih membelit diri menyebabkan mereka sulit untuk melihat kebenaran yang ada pada sesuatu dasar atau pelaksanaan itu. Justru mereka akan bertanya dan mempersoalkan. Bahkan tidak mustahil mereka akan menolaknya juga andai tidak diberikan pemahaman tentangnya.

Oleh sebab itu memberikan pemahaman kepada masyarakat mengenai Islam itu sangat penting. Ia hendaklah senantiasa menjadi keutamaan kepada pihak pemerintah demi memastikan kebodohan rakyat tentang Islam dapat dibasmi. Dengan kata lain, memberikan pemahaman tentang Islam itu adalah kerja yang tidak boleh terhenti dan hendaklah disemarakkan agar setiap pelaksanaan berkaitan dengan Islam dapat dilaksanakan dengan sebaik mungkin.

Dengan adanya pemahaman dari orang banyak maka sudah tentu sesuatu dasar dan pelaksanaan yang ingin dilakukan oleh sebuah kerajaan itu akan mendapat keberhasilan. Ibarat kata pepatah 'tak kenal maka tak cinta'. Justeru apabila sudah kenal maka cinta itu akan datang lantas hati akan dapat menerimanya dengan mudah.



## **b. Pendekatan Tadaaruj**

Aplikasi dari peranan *Tabayyun* seorang Ulama tercermin dari Konsep pelaksanaan Islam secara *tadarruj* (bertahap) yang dilakukan oleh Tok Guru Nik Abdul Aziz Nik Mat. Konsep *Tadarruj* bukanlah sesuatu yang salah bahkan hal itu sangat sesuai dengan kehendak *Syariah Islamiyyah* yang meletakkan asas bahwa agama Islam adalah agama yang mudah. Dengan kata lain, dengan *tadarruj* ia tidak akan membebankan semua pihak lantas membuktikan betapa Islam tidaklah menyusahkan umatnya.

Firman Allah SWT, yang bermaksud:

*"Allah menghendaki kemudahan bagimu dan tidak menghendaki kesukaran bagimu." (al-Baqarah: 185)*

Juga firman Allah SWT, yang bermaksud:

*Allah hendak memberikan keringanan kepadamu, dan manusia dijadikan bersifat lemah." (an-Nisa': 28)*

Di antara kemudahan yang terkandung dalam syariah Islam adalah Allah SWT mensyariatkan wujudnya *rukhsah* atau 'keringanan' dikala mendapatkan kesusahan dalam melaksanakan Islam. Dari Abdullah bin Umar, sabda Rasulullah SAW, yang bermaksud: *"Sesungguhnya Allah menyukai rukhsah, sebagaimana Allah benci melakukan maksiat.*

Di antara kemudahan yang dibenarkan dalam Islam adalah Allah SWT membolehkan melakukan hal yang haram ketika bertemu unsur mudarat.

Firman Allah SWT, yang bermaksud:

*"Sesungguhnya Allah hanya mengharamkan bagimu bangkai, darah, daging babi, dan binatang yang (ketika disembelih) disebut (nama) selain Allah. tetapi Barangsiapa dalam Keadaan terpaksa (memakannya) sedang Dia tidak menginginkannya dan tidak (pula) melampaui batas, Maka tidak ada dosa baginya. Sesungguhnya Allah Maha Pengampun lagi Maha Penyayang." (Al-Baqarah: 173)*

Di antara kemudahan yang dianjurkan dalam Islam adalah pelaksanaan secara bertahap. Ini berdasarkan kepada keadaan dan keperluan semasa pada ketika itu. Hal ini bisa dilihat pada permulaan Islam yang mana arak itu tidak diharamkan secara langsung. Sebaliknya diharamkan secara bertahap.

Sunnah alam telah menyatakan semua perkara itu bermula dari sesuatu yang kecil yang seterusnya akan menjadi besar dan terus membesar. Kekuatan itu berawal dari kelemahan. Tidak ada suatu kekuatan itu berawal dari sesuatu yang kuat bahkan semestinya berawal dari kelemahan. Tidak ada manusia itu pintar melainkan mereka berawal dari kebodohan.

Keadaan yang sama juga dalam pelaksanaan Islam. Jika tidak mampu melaksanakannya secara sempurna dalam keadaan sekarang, tetapi perlu mempunyai usaha untuk melaksanakannya pada masa yang akan datang. Yang penting ialah usaha untuk menyempurnakan pelaksanaan Islam itu hendaklah diteruskan. Meskipun adanya keringanan dalam hukum Islam bukan bermakna kita memudahkan segala sesuatu dan memilih yang sesuai saja untuk dilaksanakan tanpa ada usaha untuk memastikan keseluruhan Islam itu diupayakan untuk dilaksanakan.

Yang paling penting adalah pemahaman dari masyarakat. Setelah itu proses mensyariatkan hukum itu dapat

berlaku secara langsung ketika kesadaran mulai timbul hasil dari pemahaman masyarakat sendiri.

**c. Pendekatan Dengan Mendahulukan Pemahaman Masyarakat**

Mendahulukan pemahaman terhadap Islam adalah sesuatu yang amat penting, maka Islam amat menekankan persoalan memberikan kefahaman. Atau dengan kata lain, Islam amat menekankan umatnya menjadi umat berilmu agar mereka dapat memahami segala yang berkaitan dengan kehidupan dan seterusnya dapat menjadikan diri mereka sebagai insan yang bisa menerima kesyukuran Islam sebagai cara hidup. Oleh sebab itu tidak hairan Allah SWT mengawali turunya al-Quran itu dengan ayat, yang bermaksud: *"Bacalah dengan (menyebut) nama Tuhanmu yang Menciptakan," (Al-Alaq:1)*

Ayat ini menggambarkan betapa Islam itu datangnya dengan ilmu. Islam itu datangnya dengan memberikan penekanan terhadap penguasaan ilmu. Dengan cara ini hal ini akan dapat melahirkan umat yang benar-benar faham tentang Islam.

Cara dan kaedah mendahulukan pemahaman Islam dibandingkan dengan pelaksanaan Islam ini ternyata dilaksanakan oleh Tuan Guru Nik Abdul Aziz dalam pemerintahannya. Hal ini kerana Nik Aziz menyadari betapa pentingnya pemahaman kepada seluruh rakyat terhadap sesuatu akan memudahkan sesuatu dasar itu dilaksanakan dengan lebih sistematis dan lancar. Bahkan dengan adanya pemahaman di kalangan rakyat maka mereka dengan mudah dapat melihat manfaat dan lantas menerimanya. Lebih utama lagi pemahaman itu kelak akan mendorong rakyat untuk memastikan keberhasilan pelaksanaannya.



Oleh sebab itu kerajaan Kelantan sangat menitikberatkan persoalan menciptakan rakyat berilmu khususnya ilmu agama yang dapat membimbing mereka menjalani kehidupan di jalan yang direcai Allah SWT. Sebab itulah dapat dilihat majlis-majlis ilmu amat digalakkan. Masjid misalnya senantiasa digalakkan untuk dimakmurkan dengan majlis-majlis ilmu. Masjid bukan saja dikhususkan untuk solat, tetapi juga menjadi tempat untuk menuntut ilmu.

Bahkan jika kita berada di Pasar Siti Khadijah misalnya, akan kedengaran kuliah atau ceramah dari pembesar suara suraunya. Ini merupakan salah satu inisiatif pihak kerajaan negeri untuk membudayakan ilmu dalam kehidupan masyarakat negeri Kelantan.

Di samping itu, Tuan Guru Nik Abdul Aziz sebagai Ketua Kerajaan sendiri senantiasa memastikan pembentukan masyarakat yang akrab dengan budaya menuntut ilmu dapat dilaksanakan di negeri Kelantan. Beliau sendiri tidak pernah jemu berada di tengah masyarakat di dataran Ilmu di tengah-tengah bandar Kota Bharu untuk menyampaikan kuliah Jumat. Bahkan menamakan kawasan tersebut dengan nama Dataran Ilmu juga membuktikan betapa Kerajaan Negeri amat berkomitmen untuk menciptakan masyarakat berilmu.

Ini semua memastikan bahwa rakyat benar-benar paham tentang Islam dan seterusnya dapat membantu rakyat menilai dasar-dasar dan pelaksanaan Islam yang akan dilaksanakan oleh kerajaan negeri. Ia seharusnya akan dapat memastikan rakyat tidak keliru dan tidak mudah diracuni oleh pengaruh pihak musuh. Seterusnya ia akan memastikan setiap pelaksanaan dasar yang berlandaskan Islam di negeri Kelantan langsung mendapat dukungan dari seluruh rakyat.

Selanjutnya kita dapat melihat bagaimana Tuan Guru Nik Abdul Aziz sendiri secara langsung menerangkan kepada rakyat tentang sesuatu dasar yang akan dilaksanakan oleh kerajaan Negeri. Beliau tidak hanya mengarahkan sesuatu itu dilaksanakan dari 'bilik pejabat'nya tanpa turun ke lapangan untuk memberikan pemahaman kepada rakyat tentang apa yang ingin dilaksanakan oleh kerajaan.

Oleh sebab itu dapat ditemui masalah keadilan dan kesejahteraan masyarakat yang berlandaskan kepada Islam menjadi hal yang sangat penting dalam setiap ceramah dan kuliah Nik Aziz. Terlebih lagi ketika menghuraikan sesuatu dasar yang mahu dilaksanakan oleh kerajaan Negeri pimpinannya. Hal ini bertujuan menghindarkan terjadinya salah faham di kalangan rakyat, sekaligus menghindarkan timbulnya masalah yang tidak sepatutnya, yang kelak akan menghalangi tercapainya matlamat yang menjadi sasaran pelaksanaan dasar tersebut.

Pada awal pemerintahan Tuan Guru Nik Abdul Aziz, banyak masalah yang berhasil diatasi dalam pemerintahan tanpa mendapat suatu halangan dari rakyat. Ini membuktikan bahwa dalam pelaksanaan tersebut mendapat dukungan rakyat sekaligus membuktikan bahwa Kerajaan Negeri berhasil melaksanakan tanggungjawab mereka tanpa menimbulkan rasa kurang senang di kalangan rakyat.

Sokongan rakyat terhadap beberapa perubahan yang dibuat pada awal pemerintahan juga merupakan satu pertanda betapa kerajaan pimpinan Tuan Guru Nik Abdul Aziz mendapat tempat di hati rakyat untuk melaksanakan satu sistem pemerintahan yang bersandarkan kepada tuntunan agama Islam. Dengan kata lain usaha Kerajaan Negeri untuk menjadikan Islam sebagai cara hidup rakyat di negeri Kelantan mendapat respon yang cukup baik.

Selain itu peranan *Tahkim* diaplikasikan oleh Tok Guru melalui melaksanakan peraturan undang-undang dalam bentuk dasar-dasar yang berkaitan dengan penerapan hukum Islam adalah sebagai berikut:

1. Pengharaman judi yang dilaksanakan sejak 1 Januari 1992.
2. Menutup kelab-kelab malam dan lain-lain.
3. Menghapus kegiatan pelacuran.
4. Menggalakkan dan melaksanakan etika berpakaian Islam (menutup aurat).
5. Menguatkuasakan peraturan salon dengan mengkhususkan wanita bagi wanita dan lelaki bagi lelaki.
6. Menguatkuasakan peraturan penjualan arak. Semua jenis arak tidak dibenarkan lagi dijual dan diminum di tempat umum termasuk di hotel-hotel, restoran-restoran ataupun di gerai-gerai makanan. Bagi non muslim boleh minum di rumah-rumah kediaman mereka ataupun di tempat-tempat yang bukan tempat umum.
7. Pemisahan tempat pembayaran di semua pusat perniagaan antara lelaki dan perempuan.
8. Menutup pusat hiburan, permainan snooker (billiard) diperbolehkan dengan waktu yang terbatas dan diawasi dengan ketat.
9. Menggalakkan papan tanda berunsur dakwah, berisi ayat Al-Qur'an dan doa, melarang gambar wanita yang bertentangan dengan Islam (harus menutup aurat).
10. Membuat peraturan tentang pelancongan yang berprinsipkan Islam misalnya pelancong asing tidak bebas berpakaian tidak sopan kecuali di tempat-tempat tertentu saja.

Selanjutnya yang tidak kurang penting peranan Tok Guru adalah perjuangannya dalam menerapkan *hudud* di Kelantan dengan penggubalan Kanun Jenayah Syaria'h II (1993). Ketika *Hudud* belum dapat dilaksanakan kerana mendapat banyak halangan maka



perjuangan Tok Guru tidak berhenti tetapi terus memberikan pemahaman kepada rakyat melalui melalui dakwah, pendidikan dan politik dalam rangka upaya pencegahan kesalahan-kesalahan *Hudud* tersebut.

**d. Pendekatan Melalui *Amar Ma'ruf Nahi Munkar***

Pelaksanaan syariah sudah tentu tidak dapat lari dari prinsip hukum Islam, usaha ke arah *amar ma'ruf nahi munkar*, mencakup semua aspek pemerintahan negeri, kehidupan dan kebebasan rakyat dan keadilan kepada seluruh rakyat. Tugas ini pula hendaklah dilakukan dengan penuh tanggungjawab dan amanah. Sebagai sebuah parti Islam, PAS memahami prinsip pelaksanaan Islam dalam sebuah negeri yang diperintah dengan makna yang lebih umum. Sebagai salah satu negeri yang berpegang kepada semangat federalisme di Malaysia, negeri Kelantan amat memahami ruang lingkup dan kuasa negeri seperti yang dicatatkan dalam Perlembagaan Malaysia yang menjadikan beberapa aspek yang sepatutnya dilakukan tidak dapat dilaksanakan kerana halangan ini.

Sungguhpun demikian sebagai seorang ulama, Menteri Besar Kelantan amat faham tentang prinsip dan kehendak pelaksanaan syariah sehingga negeri Kelantan kukuh dengan dasar yang diperkenalkan lebih 20 tahun yang lalu, iaitu Membangun Bersama Islam. Menteri Besar Kelantan yang didukung oleh para ulama dan professional telah berhasil menunjukkan kepada masyarakat Malaysia kekuatan semangat dan daya juang, keyakinan kepada prinsip Islam seperti yang dipandu oleh kepemimpinan parti diperingkat pusat.

Analisis penulis bahawa peranan *uswah* seorang Tok Guru sangat melekat di dalam dirinya. Dalam melaksanakan *amar ma'ruf*

*nahi munkar*, Tok Guru selalu memulai dari dirinya sendiri. Teladan yang ditunjukkan oleh Tok Guru mencakup teladan dalam memimpin Kerajaan Negeri, memimpin Rakyat serta memimpin keluarga. Teladan dalam bentuk kesederhanaan dalam keperibadiannya sangat menginspirasi rakyat. Tok Guru jauh dari kemewahan. Hal ini juga dapat dilihat dari penampilan sehari-hari baik dalam cara berpakaian maupun dalam segala tindakan.

### **Penutup**

Berdasarkan huraian di atas dapat disimpulkan bahwa kewujudan Tok Guru Nik Abdul Aziz Nik Mat sebagai seorang Ulama tidak diragukan lagi. Hal ini dapat dibuktikan bahawa dalam rangka pelaksanaan Syariat Islam di Kelantan dilakukan oleh beliau melalui beberapa pendekatan diantaranya pendekatan dakwah, *tadarruj*, pemahaman dan *amar ma'ruf nahi munkar*. Selanjutnya peranan seorang Ulama adalah sebagai *tabligh*, *tabayyun*, *tahkim* dan *uswah* sudah melekat pada diri Tok Guru dan teraplikasi dalam kehidupannya.

Keberhasilan Tok Guru Nik Abdul Aziz Nik Mat dalam membumikan Syariat Islam di Kelantan juga tidak lepas dari kedudukannya sebagai *Umara* yakni Menteri Besar dalam tempoh masa yang cukup lama serta yang tidak kurang penting perjuangannya mendapat sokongan dari seluruh jentera pemerintahan dan rakyat Kelantan.

## Rujukan

- Alwi Hasan, Abdullah, 1996, *The Administration of Islamic Law In Kelantan*, (Dewan Bahasa dan Pustaka: Kuala Lumpur)
- Atjeh, Abu Bakar, 1979, *Beberapa Catatan Mengenai Dakwah Islam*, (Ramadani: Semarang)
- Djazuli, A, 2010. *Ilmu Fiqh (Penggalian, Perkembangan, dan Penerapan Hukum Islam)*, (Kencana: Jakarta)
- Ghani, Mohd. Fadli (Ed), 2011, *Dua Dekad Kelantan, Membangun Bersama Islam*, (Pusat Kajian Strategik Negeri Kelantan: Kota Bharu)
- Hafifuddin, 2014, *Peranan Ulama Dalam Pelaksanaan Syariat Islam di Aceh*, (Kaukaba Dipantara: Yogyakarta)
- Hafiz, Mohd Aizat Mohd Salleh al-,2015, *Pemikiran Tuan Guru Nik Abdul Aziz Nikmat*, (Publishing House: Selangor)
- Imam Bukhari, tt, *Shahih al-Bukhari*, Juz 22,(Dar al-Fikr: Beirut)
- Jamal Mohd. Lokman Sulaiman, *Biografi Tuan Guru Dato' Haji Nik Abdul Aziz Nikmat, Seorang Ulama' serta Ahli Politik Malaysia di Abad ke- 20*
- M. Kamil, M. Amiro Safwan, *Bicara Ini Untuk Murabbi*, 2015, (Ultimate Print SDN. BHD: Selangor Darul Ehsan)
- M. Natsir, 1989, *Fiqhud Da'wah*, (Media Da'wah: Jakarta)



- Nata, Abdullah, 1994, *Al-Quran dan al-Hadis*, (Raja Grafindo: Jakarta)
- Qurais Shihab, 1995, *Membumikan Al-Quran* (Mizan: Bandung)
- Saripan Rahmat, 1991, *Ulama dan Kehidupan Keagamaan Pada Awal Kurun Ke 20 Dalam Ulama Terengganu: Suatu Sorotan*, (Utusan Publication: Kuala Lumpur)
- Syaltut, Mahmud, 1996, *Al-Islam Aqidah wa Syari'ah*, Cet ke III, (Darul Kalam: Kairo)
- Wan Nik Wan Yussof, 2011, *Perspektif Tok Guru*, (Pusat Kajian Strategik Negeri Kelantan: Kota Bharu)
- Wan Ji Wan Husin dan Saifulamri M. Hussin, *Kezuhudan Umar Abdul Aziz Kesederhanaan Nik Abdul Aziz*, (Kemilau Publika: Selangor).
- Zuhaili, Wahbah az-, 2011, *Fiqih Islam wa Adillatuhu*, Jilid 7, terj. Abdul Hayyie al-Kattani dkk, (Gema Insani: Jakarta)
- Zain, Shaharir Mohammad, 2011, *Kepemimpinan Tok Guru Nika Aziz Mengikut Pandangan Sarjana Kepemimpinan Sepanjang Zaman*, (Kaab Interprise: Kuala Lumpur)